

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon


Tuig XXXV No. 1

Enero 7, 2004

www.philippinerevolution.org

Editorial

Wala pili nga oportunismo kag kagarukan



Tiempo na naman sang reaksyunaryong eleksyon. Liwat maathag masaksihan ang wala pili nga oportunismo, lubos nga kawad-on sang prinsipyo kag kagarukan sa kada mag-eleksyon. Wala sang kon ano nga nagasinaylu-saylo sang partido ang mga kandidato kag nagahakos sang mga bag-ong kaalyado kag koalisyon. Nagaupdanay pati mga anay mabaskog nga magkaaway. Wala sang iban nga nagaduso sa ila agud himuon ini kundi ang hayagan nga pagpauna sang personal nga interes, ambisyon sa pulitika kag kadaluk sang gahum. Wala kurit ang mga away, kunsabuhay kag maniobrahan sa tunga sang mga reaksyunaryo nga nagaharing sahi. Sa pagkamatuod, palareho man lang ang mga partido kag koalisyon pulitikal sang mga reaksyunaryo. Gani wala man untat ang pagbag-o-bag-o sang korte kag kaundan sang mga reaksyunaryong alyansa.

Wala untat, wala-kurit kag wala'y huya ang pagka-oportunista ni Gloria Macapagal-Arroyo. Ginpili niya nga katimbang ang senador, brodkaster kag tinawo sang mga Lopez nga si Noli de Castro agud makadto sa iya ang suporta pangpulitika kag pangpinansya sang poderoso nga burges-kumprador nga pamilya. Nagalauman siya nga masalbar sang popularidad ni de Castro ang iya nagsadsad nga reputasyon.

***Mga tampok
sa isyu nga ini...***

**Mga koresponsal halin
sa CL, ST kag
Northeastern Luzon
PAHINA 6-9**

**Padayon ang paglala
sang krisis sa US
PAHINA 10**

**Demoralisasyon sang
mga suldado nga
Amerikano sa Iraq
PAHINA 11**

Kabaylo sini ang mahimo nga pangako nga konsesyon sa ME-RALCO, Maynilad Water Services, Benpres Holdings kag iban pa nga dalagku nga negosyo sang mga Lopez.

Gindugangan pa ni Arroyo ang iya oportunismo sa klase sang mga tawo nga ginpili niya agud magdalan nga senador sa idalum sang iya partido. Lakip sa ila ang mga pangunahon nga alyado ni Estrada-sanday Miriam Defensor-Santiago, John Osmena kag Orlando Mercado, anay sekretaryo sang depensa ni Estrada. Yara pa kuno sa likod ni Defensor ang People's Movement Against Poverty ni Estrada.

Pati ang mga grupo nga sosyal-demokrata kag repormista nga nag-suporta sa pagpungko ni Arroyo sa poder ginatublag sa pag-upod-upod niya sa mga tawo nga halin sa ginakangil-aran nga mga kampo nanday Marcos kag Estrada.

Wala man sang daku nga kinalain ang pangunahon nga karibal nga kandidato ni Arroyo, ang artista nga si Fernando Poe Jr. Luwas sa anak ni Estrada nga si Jinggoy kag sanday Juan Ponce Enrile, Ernesto Maceda, Francisco Tatad, Jamby Madrigal kag Didagen Dilangalen,

lunsay sa kampo kag maukod nga tagapangapin ni Estrada, kalakip sa mga kandidato ni Poe sa senado si Imee Marcos, anak sang diktador nga si Marcos. Si Carlos Padilla naman ang mabaskog nga tagasuporta ni Panfilo Lacson nagakandidato man sa koalisyon ni Poe. Magaserbi kuno siya nga tagpatunga nanday Poe kag Lacson.

Katimbang ni Poe si Loren Legarda, nga wala mag-isip-isip nga magsimpon sa isa ka partido nga puno sang mga personahe nga malapit kay Estrada.

Wala sang nagapati sa rason nila tanan nga ang ila ginahimo para sa "paghiliusa," "rekonsilyasyon" kag "paghilom sang mga pilas." Sa kamatuoran, wala kaser-yusohan kag nangin kaladlawan na lamang ang mga reaksyunaryong pulitiko, mga partido pulitikal kag koalisyon nila kag ang bilog nga dalagan sang reaksyunaryong eleksyon sa Pilipinas.


Kadungan sini ang iban pa nga itsura sang reaksyunaryong eleksyon kag reaksyunaryong pulitika sa pungsod. Yara ang sobrang dinayaay, baklanay sang boto, pagpang-into kag ang mabaskog nga kalakasan indi lang sa tunga sang



Wala sang nagapati sa rason nila tanan nga ang ila ginahimo para sa paghiliusa," "rekonsilyasyon" kag "paghilom sang mga pilas"...wala kaseryusohan kag nangin kaladlawan na lamang ang mga reaksyunaryong pulitiko, mga partido pulitikal kag koalisyon nila kag ang bilog nga dalagan sang reaksyunaryong eleksyon sa Pilipinas.

mga magkaribal nga reaksyunaryong pulitiko kag mga tagasuporta kundi mas malaut pa, batuk sa mga progresibong partido kag pwersa kag iban pa nga pumuluyo.

Sa likod sang tanan nga ini ang esensyal nga kinaiya sang mga reaksyunaryong eleksyon. Nagaserbi ini nga paagi sang mga reaksyunaryo nga nagaharing sahi para tiplangon ang pumuluyo nga kuno may demokrasya samtang ginare-solbar paagi sini kon sanday sin-o sa ila ang magadumala sang pasistang estado nga magaamlig sa komun nga mga reaksyunaryong interes nila kag sa labi pa nga pagpanghimulos kag pagpamigos nila sa pumuluyo kag pagtapna sa pagbato sang pumuluyo. AB

 <p>Tuig XXXV No. 1 Enero 7, 2004</p> <p>Ang Ang Bayan ginabantala sa lengwahe nga Pilipino, Bisaya, Iloko, Hiligaynon, Waray kag Ingles.</p> <p>Mahimo ini i-download halin sa Philippine Revolution Web Central nga makit-an sa:</p> <p>www.philippinerevolution.org.</p> <p>Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.</p> <p>Malab-ot kami paagi sa e-mail sa: angbayan@yahoo.com</p>	
<p>Kaundan</p>	
Editorial	
Oportunismo kag kagarukan	1
Pasingkion ang panghimakas	3
Padayon nga ginatadlong sg	
Partido ang kasaypanan	4
Mga Koresponsal	
Central Luzon	6
Southern Tagalog	7
Northeastern Luzon	8
Sa Luwas sg Pungsod	
Krisis sa US	10
Demoralisasyon sa mga suldado	
nga Amerikano sa Iraq	11
Balita	12
<p>Ang Ang Bayan ginabantala duha ka beses kada bulan sang Komite Sentral sang Partido Komunista sang Pilipinas.</p>	

Pasingkion ang paghimakas anti-imperyalista, antipyudal kag antipasista

Yara subong sa wala tupong nga kalalaon sang krisis ang papet nga rehimeng Arroyo kag ang bilog nga nagaharing sistema sa Pilipinas. Ang lokal nga reaksyunaryong sistema ginabunalan sang labing grabe nga sosyo-ekonomikong krisis kag wala kapares nga kagarukan, pagkapapet kag represyon.


Nagatibusok ang malapyudal nga ekonomya base sa tanan nga mayor nga talamdan. Ang lubos nga pag-ikog-ikog sang rehimeng Arroyo sa polisiya sang US sa globalisasyon sang "libreng merkado" nagbutang sa ekonomya sa dugang nga pagkaputo. Ginapahigad na sang rehimen ang tanan nga halambalanon kaangot sa soberanya sa ekonomya, proteksyon sa pungsodnon nga patrimonya, reporma sa duta kag pungsodnon nga industriyalisasyon.

Sa tuyo sini nga makalikaw sa pagkabangkrap, labi sini nga ginalumos ang pumuluyo sa naga-bug-at nga palas-anon nga utang samtang wala untat nga nagabubobo sang pondo para sa indi produktibo nga galastuhan sa militar, pulisya, bayad-utang, korapsyon kag nanarisari nga luho sang dalagku nga burukrata kag nagaharing sahi. Bangud diri, labi nga nagaantos ang pumuluyo kag ginadingot sa ila pati ang pinakasandigan nga mga serbisyo sosyal.

Bangud sa magamay na ang ginaagawan nga resorsa sang nagaharing sahi, baraghal na ang korapsyon sang rehimeng Arroyo. Imbolbado ang mag-asawang Arroyo sa mga mayor nga kaso sang pagpamuyong. Nagakadapat nga imbestigahan kag bistahon sila angot sini. Ginbuyagyag man sang mga sulda-do nga nag-alsa sadtong Hulyo

2003 ang daku nga kaso sang korapsyon sa AFP kag gubyerno.

Ginasabat sang pasista nga kalakan ang mga pagpamatuk. Sa tanan nga rehimen nga nabutang sa poder umpisa 1986, ang rehimeneng Arroyo na ang naglista sang pinakamalubha nga rekord sa paglapas lunsay sa mga sosyo-ekonomiko



miko nga kinamatarung kag mga kinamatarung sibil kag pangpulitika sang pumuluyo.

Nagaporma ang mas malaparan kag mas dalagkuan pa nga bangaanay sang mga pwersa sang reaksyon kag rebolusyon sa pungsod. Desperado ang reaksyunaryo nga nagaharing sistema nga isalbar ang kaugalingon sa krisis gani wala kaluoy sini nga ginapuga ang pumuluyo ilabi na ang mga pinakaginhimus-

lan kag ginapigos nga sahi kag sektor. Sobra-sobra na ang pagantos kag kaakig sang mga biktima sang kadaluk kag kapintas sini.

Bangud sa grabe nga sitwasyon, mabaskog ang handum sang masang anakbalhas kag iban nga ginahimuslan kag ginapigos nga sektor nga pukanon na ang rehimeneng Arroyo.

Kinahanglan himuslan ang labing malala nga krisis sa ekonomya kag pulitika agud ubos-kusog nga pataason sang mga rebolusyonaryong pwersa ang lebel sang paghimakas gerilya, kahublagang masa kag nagahiliugyong prente. Dapat pasingkion ang paghimakas anti-imperyalista, antipyudal kag antipasista agud mas epektibo nga mapamunuan kag mapahulag ang malapad nga masa batuk sa dalagkuan nga pagpanalakay kag pagpang-abuso sa ila interes kag kinamatarung.

Ang reaksyunaryong papet nga hubon Macapagal-Arroyo ang nagapabilin nga pangunahon nga target sang mga paghimakas sang pumuluyo. Kinahanglan padayon ang pagbuyagyag, pagpakamalaut kag paghamulag diri. Kadungan sini, kinahanglan maghanda sa nagadaku nga posibilidad nga bayluhan sang iban nga pangunahon nga reaksyunaryong papet ang subong nga nagaharing hubon bangud sa madasig nga pagkahamulag sini. Sa sini, kinahanglan pukawon ang pumuluyo nga wala sang garantiya sin-o man ang magabulos kay Arroyo may pundamental nga pagkatuhay sa iya.

Padayon nga ginatadlong sang Partido ang mga kasaypanan sa mga kampanyang anti-impiltrasyon sang dekada 1980

Sa sulod sang masobra isa ka simana halin mismo sa adlaw sang ika-35 anibersaryo sang Partido sadtong Disyembre 26, 2003, liwat naman ginlarga ang mabaskog nga kampanya para samaran-dungog ang Partido Komunista sang Pilipinas angot sa mga binuang nga kampanyang anti-impiltrasyon nga natabo sadtong dekada 1980. Ginagamit na alagyan para diri ang isa ka burges nga pahayagan nasyunal agud ilaragway nga demonyo ang Partido sa mata sang publiko. Agud ipakita nga matuod ang mga panamad, nagsandig ini sa pila ka matuod nga hitabo. Pero ginhaluan ini sang mga kabutigan, pagtiko kag mga hitabo nga hapaw-hapaw matuod. Nagdetalye sa mga natabo nga pagpang-abuso pero wala maghatag detalye sa mga tikang sang Partido agud tadlungon ang mga ini.

Sa punta sang kampanya nga panamad, ginhimo nga pulpito ang editorial sang pahaygan sining Enero 2 agud magpahayag sang isa ka lubos nga anti-komunista nga sermon nga nagluad sang puro wala-sa-lugar kag wala basehan nga mga atake sa kuno "paghipos" kag "pag-


balibad" sang Partido nga atubangon ang halambalanon. Gingamit sini nga pamahog ang kontra-rebolusyonaryo kag anti-komunistang linya nga "ginakaon sang mga rebolusyonaryo ang kaugalingon nga mga anak," nga "ginbun-ag sang rebolusyon nga komunista ang bangu-

ngot sang binuang nga pagkahadlok" kag "kabahin sang kabuhi sang PKP ang pagpatay sa mga kaupod."

Bisan pa nga lubos nga baliskad ang mga akusasyon, wala kaka-poy ang Partido nga magpaathag sang panindugan, polisiya kag mga kamatuoran bahin sa halambalanon nga ini. Paliwat-liwat nga ginapahanumdom sang Partido nga madugay na sini ginkundenar, ginsikway kag gintadlong ang mga kasaypanan nga ini.

Ang mga nagaatake sa Partido nagapanawagan pa sang pagtukod sang "Truth Commission" sa tuyo nga kuhaan sang kahilwayan ang Partido, ukayon ang internal nga halambalanon, kasaysayan, organisasyon kag paghulag sini kag athagon ini indi lang sa ila kag sa publiko, kundi pati sa kaaway. Gusto nila nga ibutang sa depensiba kag pangitaan sang madamo nga buho ang Partido agud may pangbala sa ila pagguba sa Partido. Sa suma, ang pinakatuyo nila amo nga waskon kag likidahon ang Partido.

May kaugalingon nga pamaagi ang Partido bilang isa ka partido nga may integridad kag kahilwayan kag katampad sa kaugalingon kag sa prinsipyo agud maghimo sang kaugalingon nga pagpangusisa kag pagtadlong kag desaysibo nga mapunggan ang pagliwat sang mga ini. Sa kamatuoran, ang nasambit nga binuangan nga kampanya ginasakup sang Ikaduha nga Dungganon nga Kahublagang Panadlong kon sa diin gin-athag tubtub sa pinakaugat ang mga kasaypanan kag paglabag kag liwat ginpilig-on ang mga husto nga rebolusyonaryong



MGA LUBOS NGA PAGLAPAS. Ang tortyur kag iban pa nga di-makatawo nga trato sa mga ginadudahan espiya sang kaaway ukon sin-o man nga akusado sa korte sang pumuluyo lapas sa Saligang Batas ng Partido Komunista ng Pilipinas, Mga Alituntunin ng Bagong Hukbong Bayan, kag Gabay sa Pagtatayo ng Demokratikong Gubyernong Bayan.

prinsipyo. Determinado nga gintunan sang Komite Sentral ang mga kabangdanan sang mga hitabo agud magkuha sang mg leksyon, liwat palig-unon kag ipwesto ang husto nga mga pamaagi kag proseso kag malikawan nga maliwat pa ang mga kasaypanan sa palaabuton. Mas temprano pa sini, ang pila ka komiteng rehiyunal kag iban pa nga manubo nga organo kon sa diin may natabo man nga kapareho nga kasaypanan naghimo man sang ila parsyal nga pagsuma kag pagtadlong.

Mabaskog nga ginakundenar sang Partido ang binuang nga mga kampanya bilang produkto sang malala nga burges kag petiburges nga suhetibismo kag pagdali, kag seryoso nga pagpanorse kag paglapas sa mga prinsipyo, linya, polisiya kag pagsulundan sang Partido, hangaway sang banwa kag rebolusyonaryong kahublagan. Ang pagpabaya sa hilikuton ideolohiya, pagkabuyo sa kasyudaran kag pagpangibabaw sang mga sala nga linya sang adbenturismo militar kag insureksyunismong urban sadtong dekada 1980 ang nagserbi nga kundisyon agud magluntad ang mga kasaypanan nga ini.

Ang mga nagpatuman sang mga binuang nga kampanya ginpaagi sa rektipikasyon, reeduksyon kag hugot nga mga proseso pangdisiplina sang Partido santo sa bug-at sang ila partisipasyon kag responsibilidad-halin pagsaway sa may pinakamag-an tubtub sa pagpahalina sa Partido sa may pinakamabug-at nga kasal-anan.

Ang nagpabilin nga tampad sa rebolusyon nagsaway sang kaugalingon sa atubang sang mga kaupod kag naapektuhan nga masa kag nagbulig sa pagkumponer sang mga kahalitan sa mga rebolusyonaryong hilikuton kag organisasyon kag sa masa. Nagpartisipar man sila agud makabulig sa rehabilitasyon sang mga nasalbar nga

biktima kag mga nabilin nga mahal sa kabuhi nga mga wala masalbar.

Pero ang mga pinakapanguna-hon nga nagpamuno kag may pinakamalaut nga mga kriminal nga responsibilidad sa mga binuang nga kampanyang anti-impilrador nagbalibad mag-ako sa mga kasal-anan kag iban pa nga seryoso nga kasaypanan nila. Sa kainitan sang kahublagan panadlong sadtong una nga bahin sang dekada 1990, nalagyo sila sa Partido kag rebolusyonaryong kahublagan. Abi nila maswerte sila nga nakalikaw sa ila mga salabton kag responsibilidad.

Lakip sila subong sa mga lider sang magagmay nga grupo nga *psuedo-reformist* kag Trotskyista nga may misyon nga waskon ang Partido, tabunan ang kaugalingon nga krimen kag kasaypanan, kag tinguhaon nga malisyoso ipasa ang mga ini bilang "orihinal nga kasal-anan" sang Partido mismo.

Nagtukod sila sang mga grupo kag institusyon nga *psuedo-reformist*, nagpagguwa sang mga materiyales nga nagahalo sang pagpangtorse, sensesyunalismo kag hapaw nga matuod, kag nagalunsar sang mga anti-Partido nga kampanya. Ginasakdag kag ginapondohan sila sang mga internasyunal kag lokal nga anti-komunista kag kontra-rebolusyonaryong organisasyon kag institusyon. Ang pila lubos nga nagpabayad sa mga reaksiyunaryong pulitiko kag mga ahensyang paniktik sang gubyrerno sang US kag Pilipinas. Ginatiplang kag ginadabukan nila ang iba pa nga nagamuhan lang kag di pa makabaton sang kamatuoran kag mga husto nga pagpaathag.

Namentenar sang Partido ang iya rebolusyonaryong integridad kag nakapanglimpyo ini sang ranggo paagi sa kahublagang panadlong kag edukasyon agud pamatukan ang mga pang-ideolohiya kag pangpulitika nga ugat sang oportunismo kag kriminalidad kag lubos

nga mapunggan ang pagliwat sang mga ini. Nagapanaog ini sang mga aksyon pangdisiplina nga wala silut nga kamatayon kag indi maglunsar sang iba pa nga isterya. Ang mga tampad nga naghinulsol kag may minor lang nga mga kasal-anan ginpatawad para may kahigayunan nga magbag-o, mapanibag-o sang kaugalingon kag magpabilin nga rebolusyonaryo ukon mahatagan sang amnestiya.

Kadam-an sa mga nanging biktima sang mga binuang nga kampanyang anti-impilrador nga nabuhi pa kag nagapabilin nga tampad sa Partido kag rebolusyon nagpadayon sa paghulag kag pagsuporta sa rebolusyonaryong hublag. Maathag sa ila ang pagpaklaro sang Partido sa puno kag punta sang mga hitabo. Bal-an nila nga indi ini kinaiya sang Partido kag rebolusyon kundi kahimuan sang mga tuso nga nagtiko kag naglapas sa mga sandigan nga prinsipyo kag maayo nga praktika sang Marxismo-Leninismo-Maoismo kag proletaryong rebolusyon.

Sa kutob maabot sang Partido, ginatinguha sini nga ihatag sa mga nasalbar nga mga biktima kag sa pamilya sang mga wala masalbar ang mga kinahanglanon nga suporta pang-ideolohiya, sosyal, medikal kag materyal agud mabuligan sila sa rehabilitasyon kag sa pagpangibabaw sa mga labod sang ila mga mapait nga inagihan kag daku nga pagkadula.

Ginahangup sang Partido kon may pila sa mga biktima kag pamilya nila nga tubtub subong mabudlayan pa mabaton ang mga paathag kag pagpanadlong sang kahublagan sa mga hitabo nga nagsayup bisan indi man naglabot sa pagatake sa Partido kag pagtraidor sa rebolusyon. Handum sang Partido nga makig-angot kag makighambalanay sa ila. Padayon ang pagpaninguha sang Partido nga abuton ang pila ka pamilya nga wala pa



Pagpangibabaw sa konserbatismo

Nagasulong ang armadong rebolusyon sa Central Luzon

"**N**agasulong ang armadong rebolusyon sa mga ma-bulubukid nga lugar kag pati sa kapatagan sang rehiyon."

Ini ang pahayag sang Komiteng Rehiyon-Central Luzon sa ika-35 anibersaryo sang liwat nga pagtukod sang Partido. Sa partikular, siling sini, "Nagaangkon na sang kadalag-an ang Partido kag hangaway sa pagpangibabaw sa konserbatismong militar."

Nakaagaw ang mga Pulang hangaway sang BHB sang 38 armas sa mga taktikal nga opensiba kag pati sa mga dependensya nga inaway. Lakip diri ang 19 ka M16, lima ka M14, duha ka M203, isa ka M60, lima ka *shotgun* kag anum ka pistola. Nakakumpiska man ang BHB sang mga kagamitan pangkomunikasyon.

Indi magnubo sa 48 ang napatay nga kaaway. Baynte sini napatay sa mga taktikal nga opensiba pareho sang mga reyd, ambus kag operasyong harasment kag pagpangangsilut kag 28 man sa mga dependensya nga inaway. Lakip sa mga kaswalti sang kaaway ang

deputy commander sang 305th Provincial Mobile Group sang Bulacan, isa ka kapitan sang MICO (Military Intelligence Company) sa Dingalan, Aurora, isa ka *station commander* sang PNP sa Iba kag isa pa ka upisyal sang PNP sa Olongapo City, pareho sa Zambales.

Ang mga taktikal nga opensiba kag kontra-salakay nga inaway natabo humalin Pebrero 1 tuhtub Nobyembre 26, 2003. Pila sini ang reyd sa mga detasment sang PNP sa Hagonoy, Bulacan; sa Arayat, Pampanga; sa San Jose, Tarlac; kag sa Dingalan, Aurora. Ginambusan man ang kaaway sa Barangay Carag, San Marcelino, Zambales kag sa Barangay Kapintalan, Caranglan sa Nueva Ecija; kag ang bandido nga Rebolusyonaryong Hukbong Bayan (RHB) kon sa diin apat sa ila ang napatay sa Barangay Malusac, Sasmuan, Pampanga. Ginaresto kag dinisarmahan man ang mga badigard ni Gob. Vic Magsaysay sang Zambales.

Naagaw sang BHB ang inisyatiba sa kaaway, napa-ngibabawan ang mga disbentaha

kag nakalunsar sang balos nga salakay sa mga dependensya inaway sa Angat, Bulacan; sa Botolan kag sa San Marcelino (duha ka beses) sa Zambales; kag sa Sasmuan, Pampanga.


Siling sang KR-Central Luzon: "Ginapakita sang mga taktikal nga opensiba, kontra-atake kag suportahanay nga ini ang mataas nga mapang-away nga ispiritu kag kahandaon sa sakripisyo sang BHB, kag ang pag-uswag sa mga taktika nga gerilya sini. Ginapakita man ang bentaha sang pormasyong platun sa opensiba kag dependensya."

Ginapakita sang mapagsik nga pagsulong sang armadong paghimakas sa Central Luzon sa nagligad nga isa ka tuig nga "indi sablag ang kawad-on sang bukid kag talon sa iban nga erya agud mahulag ang hangaway. Indi man sablag ang kalapiton sang Maynila, ang sentro sang reaksyon. Pareho sang isda sa tubig, ang masa ang malapad nga dagat nga ginalangyan sang BHB."

Sa rebolusyonaryong kahublagang masa, madinalag-on nga naisulong ang mga paghimakas agraryo sa Bulacan, Aurora, Nueva Ecija, Pampanga kag Tarlac. Determinado ang pagtinguha sang rehiyon sa pagtukod sang mga lubos nga asosasyong masa kag mga komiteng pang-organisa halin sa anay kadam-an grupong pang-organisa. Desidido ini nga pangibabawan ang hibo sang konserbatismo sa hilikuton masa pareho sang mahina nga pag-organisa kag malaka kag pugtak-pugtak nga mga antipyudal nga paghimakas.

Sa pagtukod sang Partido, padayon nga ginalunsar sa rehiyon ang basehan kag intermedyang kurso sang Partido. Nakatapos na sang Intermedyang Kurso sang

Sundan sa "Nagasulong...", pahina 7





Halin sa Southern Tagalog

Padayon sa pagsulong sa ST sa tunga sang mabaskog nga pagpanalaky sang rehimen

Napaslawan ang todo nga pagpanalakay sang rehimen sa rebolusyonaryong kahublagan sa Southern Tagalog (ST). Indi mapunggan sang mga pagdihot sang rehimen ang padayon nga pagsulong sang rebolusyon sa rehiyon.

Humalin 1998, ginlunsar sang reaksyonaryong gubyerno sa rehiyon ang mga eksperimento sa nagkalain-lain nga taktika kag doktrina nga nagatuyo waskon ang mabaskog nga bahin sang rebolusyonaryong pwersa. Para diri, ginhimo nga pangunahon nga halambalanon nasyunal sang rehimenng Arroyo ang ST, sa partikular, ang isla sang Mindoro. Ginpadaku ang *deployment* sang mga pwersa militar, pulisya kag paramilitar. Ang 13 ka pangsalakay nga batalyon sa rehiyon sadtong 1999 gindugangan kag nangin 38 batalyon na sa una nga tunga sang 2003. Nagsabwag

sang teror sa rehiyon paagi sa malaparan kag mabaskog nga paglapas sa tawhanon nga kinamatarung sang pumuluyo.

Pero wala malutos ang rebolusyonaryong kahublagan sa ST.

Sa okasyon sang ika-35 anibersaryo sang pagkatukod liwat sang Partido Komunista sang Pilipinas, ginsaulog sang bilog nga rehiyon ang pinakaulihi nga mga kadalagan sang rebolusyonaryong kahublagan. Suno sa pahayag sa Kalihi-man sang Komiteng Rehiyon sang ST (KR-ST), nagakuha sang manggaraan nga leksyon ang Partido, hangaway sang banwa kag rebolu-

syonaryong pumuluyo sa masobra lima ka tuig nga inagihan sa pagatubang sa mabaskog nga atake sang kaaway. Ginakaptan ang mga leksyon nga ini para dugang isulong sang rebolusyonaryong paghimakas sa ST.

Sa panahon nga ginsakup, naabot sang katapuan sang Partido sa ST ang pinakadaku nga numero sini sa bilog nga kasaysayan sang rehiyon. Dugang diri, dugang nga nagalam sila sa teorya sang Marxismo-Leninismo-Maoismo kag sa teorya kag praktika sang demokratikong rebolusyon.

Padayon nga nagalapad kag nagabaskog ang baseng masa sa kaumhan kag kasyudaran sang rehiyon. Nagsugod man nga magabante ang mga prenteng gerilya nga temporaryo nag-atras sa mga ulihi nga tuig bangud sa ginpabaskog nga mga operasyon sang kaaway. Sa kamatuoran, nakalunsar na ang BHB sang matunog nga taktikal nga opensiba sa mga prenteng gerilya nga ini.

Sa masobra 10 prenteng gerilya sa rehiyon, pila ka pulo ka libo ang pumuluyo nga organisado kag pila ka gatos ka libo ang impluwensya-

Sundan sa "Padayon..," pahina 8



"Nagasulong...," halin sa pahina 6

Partido (IKP) ang daku nga mayorya sang mga pwersang pultaym sa kaumhan kag kasyudaran. Sang 2003, may 130 pwersa ang nakatapos sang pagtuon sa Aurora, Nueva Ecija, Tarlac kag Bulacan kag sa kasyudaran sang rehiyon. Sa lebel na sang lokal nga sanga sang Partido ang pagtuon sang IKP.

Ginareport man sang rehiyon nga ang "pagtuon sa

Ang Bayan nangin kinaandan na sa mga katapu sang Partido, Pulang hangaway kag mga katapu sang mga organisasyong masa. Nalipay ang mga kaupod kag masa sa mas masunson kag regular nga pagguwa sang AB kag ginabantayan nila ang pagguwa sini." Nagaabot sa 7,000 ang kopya sang kada isyu sang AB ang ginaimprenta kag ginapanagtag. Samtang, 13,000 kopya sang *Himagsik*, pahayagang masa sang rehiyon ang ginabalhag.

AB



Pahayag sang PKP-Northeastern Luzon sa Ika-35 anibersaryo sang Partido

Nagahagunos ang kahublagang masa

Ginakalipay sang masa kag mga kaupod sa Northeastern Luzon sa ika-35 anibersaryo sang Partido ang dalagku nga kadalag-an sang rebolusyonaryong kahublagan sa rehiyon, labi na sa pagsulong sang kahublagang masa. Ginasaysay sa pahayag sang Komiteng Rehiyon sang PKP sadtong Disyembre 26 ang malahalón nga pagsulong sang mga hilikuton sang Partido, Bag-ong Hangaway sang Banwa kag rebolusyonaryong kahublagan sa rehiyon.

Sadtong 2003, siling sini, humagunos ang mga mangunguma sa kabanwahanan para sa malaparan nga kampanya sa pagdula ukon pagbuhin sang usura. Napanubo sang katunga ukon halos katunga ang nagaluntad nga interes sa pautang sa 300 baryo sa 10 banwa kag mas o menos 300,000 ukon 55,000 pamilya ang nabenepisyuhan. Naghulag ang 5,000

Sundan sa "Nagahagunos...", pahina 9

"Padayon..." halin sa pahina 7

do. Ang mga prenteng gerilya nga ini may pila ka pulo ka platon sang hangaway sang banwa nga naarmasan sang mabaskog nga riple kag pila ka mabug-at nga armas nga *anti-aircraft*, *anti-tank* kag *anti-fortification* (makawasak sang kongkreto kag iba pa nga matig-a nga pader). May yara man nga pila ka libo nga milisya sang pumuluyo kag mga kwerpo sa pagdepensa-sa-kaugalingon nga naarmasan sang mga lokal nga armas, mas mahina nga riple kag mga pistola. Nakalunsar sang matingkad nga taktikal nga opensiba ang hangaway sang banwa sa rehiyon. Sadtong Septyembre 19, ginlunsar ang magkasunod nga reyd sa barko sang Philippine Navy kag detatsment sang Philippine Coast Guard sa Ungos, Real, Quezon kon sa diin nakumpiska ang mabaskog nga riple kag tatlo ka masinggan nga .50 kalibre. Ginhiwat man ang magkasunod nga ambus sa mga pwersang militar kag pulis sa duha ka probinsya sang Mindoro sadtong Septyembre 19-20 kag Oktubre 11.

Ang pagpatuman sa polisiya nga pauswagon ang mga platon bilang basehan nga pormasyon sang hangaway sang banwa napamatud-an nga epektibo sa pagpabaskog sang ikasarang sang mga yunit sang

hangaway sa mga opensiba kag depensiba kag sa hilikuton masa. Ginpauswag sa kusog-kumpanya kag ginakonsolida ang hangaway sa mga prenteng gerilya. Sa subong, napabaskog ang ikasarang sang BHB sa rehiyon nga paslawon ang mga padihut sang kaaway nga waskon ang hangaway sang banwa kag ang mga prente kag sonang gerilya. Ginabilang sang rebolusyonaryong kahublagan sa ST nga isa ka daku nga kadalag-an ang paghiwat sang Ikaduha nga Pangrehiyon nga Kumperensya sa Hilikuton Masa sa Kaumhan. Diri gintipon, ginsistematisa kag maukod nga gintun-an ang mga inagihan sang nagkalain-lain nga prubinsya para kumprehensibo maatubang ang mga problema sa pagsulong sang rebolusyong agraryo, pagtukod sang base kag pagtukod sang mga organo sang gahum pangpulitika.

Nagapabilin nga mataas ang militansya sang demokratikong kahublagang masa sa kasyudaran sa atubang sang todo-todo nga pagpangpresyur sa mga demokratikong organisasyon kag pagpamatay sa mga katapu sini. Nagatungod man ang kahublagang masa sa kasyudaran sang malahalón nga papel sa pagbato sa pasismo kag militarisasyon sa kaumhan. Maukod nga ginabuyagyag kag ginapakamalaut

sang kahublagang masa ang kada pagpamintas sa pumuluyo. Kadungan sini, ang nagalaba nga listahan sang krimen sa mga operasyon sang RSOT (Reengineered Special Operations Team) sang militar padayon nga nagatudlo sa pumuluyo nga indi suportahan ang kaaway.

Kadungan sang pagsaysay sang mga kadalag-an, ginapahayag sang KR-ST nga madamu pa ngaangkat ang alatubangon sang bilog nga rebolusyonaryong kahublagan sa rehiyon. Lakip diri ang ngapadayon nga pagsapraktika sang Marxismo-Leninismo-Maoismo, pagsakdag sa proletaryo nga estilo sang pagtrabaho sang simple nga pagpangabuhi kag determinado nga paghimakas, kag padayon nga paglubos sa mga kadalag-an sang Ikaduha nga Dungganon nga Kahublagang Panadlong.

Suno pa sa Kalihiman, bug-os ang pagsalig sang Partido nga paganihon sang rebolusyonaryong kahublagan ang dalagku nga kadalagan sa maabot nga mga bulan kag tuig para padayon nga magtipon sang kusog padulong sa dugang nga pag-abante sang pagtukod sang Partido, armadong paghimakas, nagahiliugyong prente kag hilikuton alyansa kag sang rebolusyonaryong kahublagang masa kag mga kampa-nyang masa.

AB



"Nagahagunos..." halin sa pahina 8

nga mangunguma sa 130 baryo.

Indi lang ang mga katapu sang mga organisasyon sang mangunguma ang nabenepisyuhan sang pagnubo sang interes kundi tanan nga mangunguma nga nagautang sa mga komersyante-usurero. Napadaug man ang sadto daw imposible-nga indi na sa ginutangan makabaligya sa mas manubo nga presyo ang mga mangunguma. Nakapamag-an man sa masa ang pagkuha sang pagpangdaya sa baligyaanay kag pagpanubo sa pamasaha sa produkto.

Ang dalagku nga kadalag-an nagsugod sa lebel sang sityo kag baryo nga paghulag-pagpanubo sang renta sa duta, pagpataas sang suhol sang mamumugon sa uma paagi sa pagdugang sang P10-30 kada adlaw, pagpamatuk sa pagpalayas sa mga agsador, pagpanubo sa bayad sa irigasyon, pagpanubo sa presyo sang balaligyaon sa mga tindahan sa baryo, kag paglubad sa madamu pa nga iban nga problema sang masa. Sa natipon nga magagmay nga kadalag-an kag sa nakita nga kapagsik kag kahandaan sang masa nga maghulag sa tunga sang mga operasyon sang kaaway, labi nga nagbaskog ang pagsalig nga masarangan pa ang mas dalagku nga away.

Lakip sa mga kadalag-an ang pagsulong sang paghimakas batuk sa pag-agaw sang duta kag batuk

sa pagpalayas sa mga mangunguma sa madugay na ginaobrahan nga duta agud minahon sang mga imperialista kag ni Gob. Faustino Dy ang manubo klase ng karbon diri.

Naglapad ang gin-abot sang rebolusyonaryong propaganda. Sa nagklain-lain nga paagi nakalab-ot ini sa masang mangunguma kag nahanunga nga pwersa. Nagakalipay ang masa kon mabatian nila ang makahason kag matalum nga ginatalakay sa midya sang kapareho nila nga mangunguma ang mga problema, mga demanda kag panindugan sa mga isyu. Pati sila nagaisog sa paghambal, pagsabat kag pagsulat sa radyo kag nagasulod sa ila paminsaron nga wala na sang iban nga paagi kundi ipakig-away ang kinamatarung.

Nadoble ang kadakuon sang baseng masa. Natriple ang isip sang kabilugan nga organisadong masa, labi na sang mga organisadong kababainhan kag pamatan-on.


Sa hilikuton militar, mabatian ang lupok sang mga taktikal nga opensiba sa tanan nga prente. Indi mag-nubo sa 50 ang patay sa kaaway sang 2003. Lima naman ka Pulang hangaway sa rehiyon ang naghalad sang kabuhi.

Labi nga nagdaku ang BHB sa Northeastern Luzon halin sadtong 1999 kag padayon ini nga ginakonsolida sang Partido. Pinakadaku ang numero sang mga Pulang hangaway nga nagtapos sang Intermedyang Kurso sang Partido sang 2003.

Siling sang PKP-Northeastern Luzon, ang mga pagsulong nga ini halad sa masa sang rehiyon, sa mga martir sang pumuluyo kag sa mga ordinaryong hangaway kag kadre sang hangaway sang banwa. Pursigido ini nga padakuon pa ang hangaway sang banwa, dugangan ang mga pormasyon, palaparon kag dugangan ang mga prenteng gerilya kag padamuon ang mga aktibista, katapu kag sanga sang Partido sa lokalidad.

"Sa ubay sang mataas nga organo, nagadaku kag nagabaskog ang aton kahublagan. Ang nakita naton nga paghagunos sang kahublagang masa kag nasuguran nga lupok sang mga yunit gerilya senyal sang mas dalagku pa nga paghagunos sa masunod nga mga tuig."

AB





Padayon ang paglala sang krisis sa US

Indi pagbawi kundi dugang nga paggrabe sang krisis sa sulod sang US ang masnahon nga ginalaragway sang ginapabugal nga "pagtubo" sa ekonomya sini subong. Tampok sa "pagtubo" nga ini ang pagpapagsik sang produksyon kag katuwang nga paglala sang pagpanghimulos, pagpabudlay kag pagpanghimulos sa mga mamumugon.

Sadtong Oktubre, gin-anunsyo sang rehimeng Bush ang pagtubo sang GPD sang US sang 8.2% para sa ikatlo nga kwarto sang tuig. Halin ini sa halos 2% lang nga pagdaku sa una nga anum ka bulan sang 2003. Bangud sini, ginabanta nga maabot sa 4% ang kabilugan nga pagtubo sang GDP para sa bilog nga tuig, mas mataas sa una nga tantya nga 2-3%.

Suno sa estadistika sang US, ginduso sang mas daku nga konsumo (6.8%) kag pamuhunan (11.1%) ang nasambit nga pagtubo. Ang pangunahon nga nagtaas amo ang pulupahanon nga demanda para sa mga produktong pangkonsumo pareho sang mga kotse kag iban pa nga kagamitan. Nagdaku man ang demanda para sa pamalay kag iban pa nga kagamitan pangtransportasyon, sa partikular, mga bag-o nga eroplano.


Madumduman nga naga-usos sa resesyon ang ekonomya sang US sadtong Marso 2001 pagkatapos lumupok ang bula sang *high-tech*. Nagkalahulog sa *stock market* (baligyaan sang mga sapi) ang ginpahabuk nga balor sang mga sapi (*overvalued stocks*) sang mga kumpanya sa internet kag *high-tech*.

Sadtong Nobyembre 2001, gin-deklarar sang rehimeng Bush nga tapos na ang resesyon bangud sa pagtubo sang GDP sang 2.6%. Pero nagaguwa nga indi ini bastante agud padayon nga magtubo kag lubos nga makabutwa sa resesyon ang ekonomya.

Nagkamang kag indi lang naghi-

nay ang pagtubo sang ekonomya sa masunod nga mga bulan. Indi nanging signipikante ang pagtubo sa mga basehan nga industriya sang US.

Nagapabilin nga maluya ang industriyal nga produksyon. Nagtaas lang sang 1% ang produksyon sang sektor sang manupaktura, sa partikular, mga produkto pangkonsumo kag *high-tech* pareho sang mga kompyuter, *semiconductor* kag kagamitan pangkomunikasyon. Sa abereyds, mas manubo pa gihapon ang numero sang mga pabrika nga



nagagana subong ikumparar sa nagtaliwan nga 30 tuig.

Labing ginpakita sang mahina nga produksyon ang nagapadaku nga depisit sa negosyo sang US. Sining Nobyembre, samtang nagadaku ang eksport sang \$1.7 bilyon, dugang nga nagdaku ang import sang \$2.5 bilyon-bagay nga nagpahabuk sa depisit sa negosyo pakadto sa \$47.4 bilyon. Kadam-an sa

mga ginaangkat nga produkto amo ang mga produkto pangkonsumo kag mga presyo pangsalakyan.

Sa tunga sang ginapabugal nga "rekoberi," wala sang natuga nga bag-o ukon dugang nga mga trabaho gani ginasiling ini sang mga ekonomista nga "*jobless recovery*". Sa kamatuoran, nagakatabo ang lapnagon nga pagmasaker sang mga trabaho kag labi pa nga nagagrabang ang disempleyo sa US.

Bunga ini sang pagkasangkapang sang dalagku nga kapitalista sa US sa dugang nga pagtaas sang pangkabilugan nga produktibidad sang mga mamumugon kag pagpahaba sang ila oras sang pagtrabaho agud labing pasingkion ang pagpanghimulos sa masobra nga ginpagamay nga numero sang mga regular nga mamumugon.

Halin Nobyembre 2001, nagabot sa abereyds nga 400,000 ang nagakadulaan sang trabaho kada simana-mas mataas sa abereyds nga 305,000 kada simana sa panahon sang resesyon. Sa sulod lang sang nagligad nga duha ka tuig, masobra tatlo ka milyon nga Amerikano ang nadulaan sang trabaho. Sining Agosto, nag-abot sa 6.1% ang tantos sang disempleyo-pinakamataas sa nagaliwan nga 20 tuig.

Wala man nakabenepisyo sa "pagbawi" sang ekonomya bisan ang mga may trabaho. Nakalansang kundi man nagakupos ang matuod nga balor sang sweldo. Halin Nobyembre 2001, nagtaas lang sang 0.8% ang suhol kag sweldo. Sining nagligad nga mga binulan kon sa diin tumimbuok sang 40% ang neto nga kita sang mga korporasyon (pinakamadalam sa sulod sang 60 tuig), nag-us-os man pakadto sa 0.6% ang matuod nga balor sang sweldo. AB



Mabaskog ang demoralisasyon sang mga suldado nga Amerikano sa Iraq

Labi nga nagabaskog ang demoralisasyon sa kubay sang mga suldado nga Amerikano sa Iraq sa tunga sang nagapadayon kag organisadong nga pagbato sang pumuluyo nga Iraqi.

Pinakadaku nga sangkap sa demoralisasyon sang mayorya nga suldado nga Amerikano ang wala-salig sa ginasiling sang



Pinakadaku nga sangkap sa demoralisasyon sang mayorya nga suldado nga Amerikano ang wala-salig sa ginasiling sang ila gubyrno nga basehan sang pagpanalakay kag pagpabilin nila sa Iraq.

ila gubyrno nga basehan sang pagpanalakay kag pagpabilin nila sa Iraq. Bal-an nila nga pangbala lang sila sa kanyon sa isa ka gera nga wala kapuslanan kag daw wala na sang katapusan.

Kutob sang Disyembre 3, nag-abot na sa 441 ang suldado nga Amerikano ang napatay bunga sang atake sang mga gerilya. Sa amo man, nag-abot sa 1,209 nga sulda-do ang napilasan halin Septyembre. Masobra 20% sang mga napi-lasan ang nag-angkon sang grabe nga igo sa ulo samtang mas mada-mo pa ang napiang. Ang masobra doble nga pagdamo sang mga kas-walti sa bahin sang mga suldado nga Amerikano sining nagligad nga apat ka bulan ikumparar sa una nga apat ka bulan pagkatapos ideklarar nga tapos na ang gera nagpatima-an sang mas organisado kag mas mataas nga lebel sang pagpakig-away sang mga patriyotiko nga pwersang Iraqi. Nagaabot sa 30 ka atake sang mga gerilyang Iraqi ang ginaatubang sang mga suldado nga Amerikano kada adlaw.

Indi katingalahan nga impyer-no ang pagbilang sang 130,000 nga suldado sa ginpalawig nila nga deployment sa Iraq. Dugang sa pagtaas sang peligro, nagaantos sila sang mabaskog nga kawad-on kag kabudlayan.

Madali sila salakayon sang mga gerilya nga permi nagasunod sa ila, labi nga kulang ang ila proteksyon. Kulang ang suplay sang mga *bullet-proof vest* para sa mga suldado nga nagapatrulya. Bangud sini, mismo mga pamilya na sang mga suldado ang nagabakal kag nagapadala sa ila sang mga vest. Kulang katama

ang suplay sang nga mainom. Masami man maapektuhan ang ila suplay sa pagkaon.

Halin Mayo 1, nagaabot na sa 17 suldado ang kumpirmado nga naghikog. Madamo pa nga mga kaso sang posible nagpakamatay ang ginaimbestigahan subong. Masobra 500 suldado na ang ginpauli sa US bunga sang troma sa gera kag mabaskog nga problema sikolohikal. Magagmay nga numero lang ini ikumparar sa ginreport nga 8,093 pasyente ang ginabaton sang isa ka ospital militar sa Germany kon sa diin kadam-an nga suldado nga Amerikano nakadestino sa Iraq ginadala bangud sa depresyon kag iban pa nga balatian sikolohikal.

May mga report nga indi hugod magpakamatay ang iban nga suldado. Suno man mismo nga imbestigasyon sang US Army, gintuyo sang iban nga pilasan lang ang kaugalingon sa desperasyon nga makalikaw sa pagkadestino sa ila sa Iraq. Matapos ini nga ginpatu-man sang US ang "*stop-loss order*." Ang mandu nga ini nagapalawig sa serbisyo sang tanan nga suldado nga Amerikano sa Iraq, bisan yad-tong mga natalana na nga bumalik sa US kag yadtong mga magaretiro.

Luwas pa sa mga nagpakama-tay, nagadamo ang suldado ang basta lang maghalin sa ila mga pwesto ukon indi na magbalik sa destino halin sa pagbakasyon. Si-ning Disyembre, magaabot sa 1,700 nga mga suldado nga Ameri-kano ang nagabalibad magbalik sa ila mga pwesto sa Iraq kag nagata-go na lang sa awtoridad pagkata-pos sila gintugutan magbisita sang makadali sa US.

AB

Kampo sang RPA, ginsalakay sang BHB

MADINALAG-ON nga sinalakay sang Bag-ong Hangaway sang Banwa (BHB) ang isa ka kampo sang RPA-ABB sa Sityo Kakha, Barangay Tamlac, Sta. Catalina, Negros Oriental sadtong kaagahon sang Disyembre 16. Naagaw sang BHB ang 11 M16 kag isa ka M79 halin diri.

Sa ginhiwat nga operasyon, napatay ang timlader kag isa pa ka tinawo sang RPA-ABB "Third District." Suno sa Southeastern Front sang BHB-Negros, ang ginlunsar nga operasyon pagbawi sa mga armas sang Partido nga ginkawat sang RPA-ABB sang mag-sipak ini sa rebolusyonaryong hublag kag sang ulihi nagsimpon sa reaksyunaryong hangaway.

Suno pa sa BHB-Negros, ginsilutan sini ang kontra-rebolusyonaryo nga bandidong grupo bangud sa ginahimo sini nga serye sang pangpangholdap, pagpangawat karbaw, pagpangawat kag pagpalusot sang iligal nga droga. Ang RPA-ABB ginakasangkapan man nanday Eduardo "Danding" Cojuangco kag Gov. George Arnaiz sang Negros Oriental sa pagpatuman sang mga proyekto nga mapanamad sa pangabuhian sang mga mangunguma.

2 lider sa ng ligal nga demokratikong organisasyon, ginpatay sang militar

DUHA ka lider sang ligal nga demokratikong kahublagan ang ginpatay sang militar sining Disyembre.

Ginluthang tubtub sa mapatay sadtong Disyembre 23 si Romy Malabanan, lider sang Bayan Muna, sa atubang sang iya balay sa Bai, Laguna. *Executive assistant* siya sang subong nga meyor kag pangkabilugan nga sekretaryo sang Bayan Muna sa Bai sang patyon. Nangin katapu siya sang komiteng tagapatuman sang KASAMA-Timog Katagalugan antes magsaylo sa Bayan Muna.

Mabaskog niya nga ginapamatukan ang plano sang AFP nga magtukod sang kampo sa linderong Bai kag Los Banos kag paglunsar sang mga operasyon sang AFP sa Bai.

Sa subong, nagaabot na sa 38 ang ginpatay nga katapu sang Bayan Muna. Partikular sa Timog Katagalugan, ika-74 si Malabanan sa mga aktibista nga ginpatay sa tuig 2003.

Samtang sa Sorsogon, naginggit man sang katarungan ang mga militante nga organisasyon kag lima ka nailo nga anak ni Susan Habac Aringo, 38 tuig nga bala kag *municipal coordinator* sang Gabriela Women's Party sa Sorsogon. Sadtong Disyembre 7, nagapakadto sa talmnan si Aringo sang luthangon siya sa likod sang mga elemento sang militar kag CAFGU sa Sityo Muladbulad, Barangay San Isidro, Castilla.

Ginbulad sang militar ang pilason nga si Aringo sa plasa sang banwa bangud katapu kuno siya sang Bag-ong Hangaway sang Banwa. Nadala pa siya sa ospital sang duha niya ka anak pero namatay man siya bangud sa pagkaubos sang dugo.

Ginkawat man sang mga suspetsado kay Aringo ang iya *cellphone* kag kwarta.

Militar sa Panay, kinasuhan sang paglabag sa tawhanon nga kinamatarung

Ginkasuhan sang mga mangunguma sa Iloilo ang mg tropa sang 47th IB kag Provisional Battalion sang Task Force Panay sang paglapas sa mga tawhanon nga kinamatarung. Pormal nga ginpasa-ka ang reklamo sang malaparan nga pang-abuso militar sa rehiyunal nga opisina sang Commission on Human Rights sa Iloilo City sadtong Disyembre 22. Gina-insister man sang mga lider sang Alyansa sang mga Mangunga sa Igaras (AMI) kag sang mga upisyal sang duha ka barangay sa Igaras kag Tubungan ang gilayon nga pagpahalin sa mga pwersa militar sa nabagatnan-nakatundang Iloilo.

Samtang, sa Negros Oriental, ginpamatud-an sang mga militante nga organisasyon kag tawong simbahan nga may mga paglapas sa tawhanon nga kinamatarung ang 61st IB sa mga baryo sang Siaton. Gindokumento nila ang 36 kaso sang paglapas sa tawhanon nga kinamatarung, base sa resulta sang *ila fact-finding mission* didto.


Cheney, pagakasuhan sang pagpanuhol

NAGAHANA nga kasuhan sang korte sa France si US Vice-president Richard Cheney sa mga kaso nga pagpanuhol, paghimulos sa mga aset sang korporasyon kag *money laundering* (pagligalisa sang kwarta nga napatuhaw paagi sa krimen). Kaangot ini sa pagtukod sang Halliburton Corporation sang isa ka *liquification factory* sa Nigeria sadtong dekada 1980.

Suno sa imbestigasyon sang France, nag-abot sa \$180 milyon ang ginantan-tya ginpanuhol sang Halliburton sa gubyrno sang Nigeria agud gilayon ini pahanugutan magtukod sang pabrika. Ginpamunuan ni Cheney ang Halliburton sa panahon nga ina kag antes siya mapilian nga bise-presidente sang US sadtong 2001.

Editoryal

Wala pli nga oportunismo kag kagarukan



Tiempo na naman sang reaksyunaryong eleksyon. Liwat maathag nga masak-sihan ang wala pli nga oportunismo, lubos nga kawad-on sang prinsipyo kag kagarukan kada mag-eleksyon. Wala sang kon ano nga nagasinaylu-saylo sang partido ang mga kandidato kag nagahakos sang mga bag-ong kaalyado kag koalisyon. Nagaupdanay pati mga anay mabaskog nga magkaaway. Wala sang iban nga nagaduso sa ila agud himuon ini kundi ang hayagan nga pagpauna sang personal nga interes, ambisyon sa pulitika kag kadaluk sang gahum. Wala kurit ang mga away, kunsabuhay kag maniobrahan sa tunga sang mga reaksyunaryo nga nagaharing sahi. Sa pagkamatuod, palareho man lang ang mga partido kag koalisyon pulitikal sang mga reaksyunaryo. Gani wala man untat ang pagbag-o-bag-o sang korte kag kaundan sang mga reaksyunaryong alyansa.

Wala untat, wala-kurit kag wala'y huya ang pagka-oportunista ni Gloria Macapagal-Arroyo. Ginpili niya nga katimbang ang senador, brodkaster kag tinawo sang mga Lopez nga si Noli de Castro agud makadto sa iya ang suporta pangpulitika kag pangpinansya sang poderoso nga burges-kumprador nga pamilya. Nagalauman siya nga masalbar sang popularidad ni de Castro ang iya nagsadsad nga reputasyon.

**Mga tampok
sa isyu nga ini...**

**Mga koresponsal halin
sa CL, ST kag
Northeastern Luzon**
 PAHINA 6-9

**Padayon ang paglala
sang krisis sa US**
 PAHINA 10

**Demoralisasyon sang
mga suldado nga
Amerikano sa Iraq**
 PAHINA 11